



*La Vierge Marie va visiter sainte Elizabeth sa cousine , auant la
Natiuité de saint Iean-Baptiste.*

En ces iours-là Marie se leua , & s'en alla aux montagnes en vne ville de Iuda , & entra en la maison de Zacharie , & salua Elizabeth. Et quand Elizabeth eut ouï la salutation de Marie , l'Enfant tressaillit dans son ventre , & fut Elizabeth remplie du saint Esprit , & s'escria à haute voix : Tu est benite entre les femmes , & benit est le fruit de ton ventre. Et dont vient cecy , que la mere de mon Seigneur vienne à moy ? car incontinent que la voix de ta salutation est paruenue à mes oreilles , l'enfant a tressailli de ioye en mon ventre. Or bien-heureuse est celle qui a creu , car les choses qui luy ont esté dites par le Seigneur , luy seront accomplies. Adonc Marie dist , Mon ame magnifie le Seigneur , & mon esprit s'est esiouy en Dieu mon Sauueur : Et Marie demeura avec elle enuiron trois mois , puis retourna en sa maison. Or Elizabeth enfanta vn fils , dont s'esiouyrent ses parents , de la misericorde que le Seigneur auoit déclaré enuers elle , & il fut circoncis , & le vouloient nommer Zacharie du nom de son pere , mais la mere l'empescha. Aussi Zacharie escriuit son nom en ses tablettes , & leur dit , Non , il sera appellé Iean : & sa langue muette fut deliée.